



梅溪詞序

關雎而下三百篇當時之歌詞也聖師冊以爲
經後世播詩章於樂府被之金石管絃屈宋班
馬繇是乎出而自變體以來司花傍輦之嘲沉
香亭北之詠至與人主相友善則世之文人才
士遊戲筆墨於長短句間有能瓌竒警邁清新
閑婉不流於詭蕩汙淫者未易以小伎言也予
掃軌林扃草長門逕一日聞剝啄聲園丁持謁
入視之汴人史生邦卿也迎坐竹陰下郁然而
秀整俄起謂予曰某自冠時聞約齋之號今亦



既有年矣君身益湮晦某以是來見無他求袖
出詞一編予驚笑而不答生去始取讀之大凡
如行帝苑仙瀛輝華絢麗欣眙駭接因揜卷而
嘆曰有是哉能事之無遺恨也蓋生之作辭情
俱到織綃泉底去塵眼中妥帖輕圓特其餘事
至於奪茗艷於春景起悲音於商素有瓌竒警
邁清新閑婉之長而無施蕩汙淫之失端可以
分鑣清真平睨方回而紛紛三變行輩幾不足
比數山谷以行誼文章宗匠一代至序小晏詞
激昂婉轉以伸吐其懷抱而楊花謝橋之句伊

川猶稱可之生滿襟風月鸞唵鳳歎鏘洋乎口
吻之際者皆自漱滌書傳中來况欲大肆其力
於五七言迴鞭温韋之塗掉鞅李杜之域躋攀
風雅一歸於正不於是而止雖然予方以耽泥
聲律而顛踣擯棄今又區區以勉生非惑耶若
覽斯集者不措於玄黃牝牡哀沈而悼未遇實
繫時之所尚予老矣生須髮未白數路得人恐
不特尋美於漢生姑待之生名達祖邦卿其字
云嘉泰歲辛酉五月八日張鎡功甫序

梅溪詞目錄

綺羅香

雙雙燕

陽春曲

海棠春令

夜行船

東風第一枝 三

玉樓春 二

黃鍾喜遷鶯

萬年歡

阮郎歸 二

眼兒媚 二

憶瑤姬

南歌子

風流子 二

金盞子

杏花天 四

三姝媚

壽樓春

于飛樂

南浦

探芳信

祝英臺三

清商怨

西江月四

慶清朝

憶故人二

花心動

解佩令

菩薩蠻三

賀新郎五

夜合花二

留春令二

瑞鶴仙二

點絳脣二

青玉案

浣溪沙

蝶戀花

臨江仙三

漢宮春

蘭陵王

風入松

隔浦蓮二

鳳來朝

玉簫涼

鵲橋仙

湘江靜

玲瓏四犯二

八歸

過龍門二

玉蝴蝶

齊天樂五

燕歸梁二

月當廳

秋霽

滿江紅三

戀繡衾三

換巢鸞鳳

惜奴嬌

龍吟曲 三

鷓鴣天 四

惜黃花

玉燭新

一剪梅 二

醉落魄 二

醉公子

步月

梅溪詞

自註

史

達祖

邦卿

東坡仙韻

綺羅香

詠春雨

做冷欺花將烟困柳千里偷催春暮盡日冥迷
愁裏欲飛還住驚粉重蝶宿西園喜泥潤燕歸
南浦最妨他佳約風流鈿車不到杜陵路
上望極還被春潮晚急難尋官渡隱約遙峯和
淚謝娘眉嫵臨斷岸新綠生時是落紅帶愁流
處記當日門掩梨花剪燈深夜語

雙雙燕

過春社了度簾幕中間去年塵冷差池欲住試
入舊巢相並還相離梁藻井又軟語商量不定
飄然快拂花梢翠尾分開紅影芳徑芹泥雨
潤愛貼地爭飛競誇輕俊紅樓歸晚看足柳昏
花暝應自棲香正穩便忘了天涯芳信愁損玉
人日日盡欄獨凭

陽春曲

杏花煙梨花月誰與暈開春色坊巷曉悵悵東
風斷舊火銷處近寒食少年蹤跡愁暗隔水南
山北還是寶絡雕鞍被鶯聲喚來香陌記飛

蓋西園寒猶凝驚醉耳誰家夜笛燈前重簾不
掛帶華裾粉淚曾拭如今故里信息賴海燕年時
相識奈芳草正鎖江南夢春衫怨碧

海棠春令

似紅如白含芳意錦宮外烟輕雨細燕子不知
愁驚墮黃昏淚燭花偏在紅簾底想人怕春
寒正睡夢著玉環嬌又被東風醉

夜行船

正月十八日聞
賣杏花有感

不剪春衫愁意態過收燈有些寒在小雨空簾
無人深巷已早杏花先賣白髮潘郎寬沈帶

怕看山憶他眉黛草色拖裙烟光惹鬢常記故園挑菜

東風第一枝

詠春雪

巧沁蘭心偷粘草甲東風欲障新暖謾凝碧瓦
難留信知暮寒較淺行天入鏡做弄出輕鬆纖
軟料故園不捲重簾悞了乍來雙燕青未了
柳回白眼紅欲斷杏開素面舊遊憶著山陰厚
盟遂妨上苑寒爐重暖便放慢春衫針線恐鳳
靴挑菜歸來萬一灞橋相見

又

壬戌閏臘望雨中立癸亥春與高賓王各賦

草脚愁蘇花心夢醒鞭香拂散牛土舊歌空憶
珠簾綵筆倦題繡戶粘雞貼燕想立斷東風來
處暗惹起一掬相思亂若翠盤紅縷今夜覓
夢池秀句明日動探花芳緒寄聲沽酒人家預
約俊遊伴侶怜他梅柳乍忍俊天街酥雨待過
了一月燈期日日醉扶歸去

又

燈夕清坐

酒館歌雲燈街舞繡笑聲喧似簫鼓太平京國
多歡大酺綺羅幾處東風不動照花影一天春
聚耀翠光金縷相交苒苒細吹香霧羞醉玉

少年丰度懷艷雪舊家伴侶閉門明月關心倚
牕小梅索句吟情欲斷念嬌俊知人無據想袖
寒珠絡藏香夜久帶愁歸去

玉樓春

社前一日

遊人等得春晴也處處旗亭堪繫馬雨前穠杏
尚娉婷風後殘梅無顧藉 忌拈針線還逢社
鬪草羸多裙欲卸明朝雙燕定歸來叮囑重簾
休放下

又

賦梨花

玉容寂寞誰爲主寒食心情愁幾許前身清淡

似梅嬌遙夜依微留月住 香迷蝴蝶飛時路
雪在秋千來往處黃昏著了素衣裳深閉重門
聽夜雨

黃鍾喜遷鶯

元宵曲

月波疑滴望玉壺天近了無塵隔翠眼圈花水
絲織練黃道寶光相直自怜詩酒瘦難應接許
多春色最無賴是隨香趁燭曾伴狂客 蹤跡
謾記憶老了杜郎忍聽東風笛柳院燈疎梅廳
雪在誰與細傾春碧舊情拘未定猶自學當年
遊歷怕萬一悞玉人夜寒簾隙

萬年歡

兩袖梅風謝橋邊岸痕猶帶陰雪過了忽忽燈
市草根青發燕子春愁未醒悞幾處芳音遼絕
烟谿上采綠人歸定應愁沁花骨非干厚情
易歇奈燕臺句老難道離別小徑吹衣曾記故
里風物多少驚心舊事第一是侵堦羅襪如今
但柳髮晞春夜來和露梳月

阮郎歸

龍香吹袖白藤鞭帽簷衝柳烟一春幾度畫橋
邊東風聽管絃花活計酒因緣從人嘲少年

真須吟就綠楊篇灣頭寄小憐

又月下感事

舊時明月舊時身舊時梅萼新舊時月底似梅
人梅春人不春香入夢粉成塵情多多斷魂
芙蓉孔雀夜温温愁痕即淚痕

眼兒媚 寄贈

潘郎心老不成春風味隔花塵簾波浸笋牕紗
分柳還過天津近時無覓湘雲處不記是行
人樓高望遠應將秦鏡多照施顰

又代荅

兒家七十二鴛鴦珠珮鎖瑤箱期花等月秦臺
吹玉賈袖傳香 十年白玉堂前見直是剪柔
腸將愁去也不成今世終誤王昌

憶瑤姬

騎省之悼也

嬌月籠烟下楚嶺香分兩朶湘雲花房漸密時
弄杏牋初會歌裏殷勤沉沉夜久西牕屢隔蘭
燈幔影昏自綵鸞飛入芳巢繡屏羅薦粉光新
十年未始輕分念此飛花可憐柔脆銷春空
餘雙淚眼到舊家時節謾染愁巾神山說道凌
虛一夜相思玉樣人但起來梅發牕前哽噎疑

是君

南歌子

采綠隨雙槳看山藉一筇關南桃樹幾番紅昨
夜詩情頻在雨聲中 花逕無雲隔苔垣只夢
通舊歡一餉可過從試覓鴛鴦新杏簡春風

風流子

紅樓橫落日蕭郎去幾度碧雲飛記牕眼遞香
玉臺妝罷馬蹄敲月沙路人歸如今但一鷺通
信息雙燕說相思入耳舊歌怕聽琴縷斷腸新
句羞染烏絲 相逢南溪上桃花嫩嬌樣淺淡羅

衣恰是怨深腮赤愁重聲遲悵東風巷陌草迷
春恨軟塵庭戶花悞幽期多少寄來芳字都待
還伊

又

飛瓊神仙客因遊戲誤落古桃源藉吟牋賦筆
試融春恨舞裙歌扇聊應塵緣遣人怨亂雲天
一角弱水路三千還因秀句意流江外便隨輕
夢身墮愁邊風流休相悞尋芳縱來晚尚有
他年只爲賦情不淺彈淚風前想霧帳吹香獨
憐竒俊露杯分酒誰伴嬋娟好在夜軒涼月空

自團圓

月軒其
號也

金盞子

獎綠催紅仰一番膏雨始張春色未踏畫橋煙
江南岸應是草穠花密尚憶濺裙蘋溪覺詩愁
相覓光風外除是倩鶯煩燕謾通消息梨花
夜來白相思夢空攔一株月深深柳枝巷陌難
重遇弓彎兩袖雲碧見說倦理秦箏怯春葱無
力空遺恨當時秀句蒼苔蠹壁

杏花天

軟波拖碧蒲牙短畫橋外花晴柳暖今年自是

清明晚便覺芳情較嬾 春衫瘦東風剪剪過
花塢香吹醉面歸來立馬斜陽岸隔岸歌聲一
片

又

古城官道花如霰便恰限花間再見雙眉最現
愁深淺隔雨春山兩點 回頭但垂楊帶苑想
今夜銅駝夢遠行人去了鶯聲怨此度關心未
免

又

細風微月垂楊院記年少春愁一點棲鶯未覺

花梢顫踏損殘紅幾片 長安共日邊近遠况
老去芳情漸減屏山幾夜春寒淺却將因而夢
見

又

扇香曾靠腮邊粉舊塵埋月輪有暈南風未似
愁來近前事臨牕隱隱 涼花畔雲歌露飲夢
斷了終難再問鴛鴦帶上三生恨將淚揩磨不
盡

三姝媚

煙光搖縹瓦望晴簷多風柳花如洒錦瑟橫牀

想淚痕塵影鳳絃常下倦出屏帷頻夢見王孫
驕馬諱道相思偷理綃裙自驚腰袂 惆悵南
樓遙夜記翠箔張燈枕肩歌罷又入銅駝遍舊
家門巷首詢聲價可惜東風將恨與閑花俱謝
記取崔徽模樣歸來暗寫

壽樓春

尋春服感念

裁春衫尋芳記金刀素手同在晴牕幾度因風
殘絮照花斜陽誰念我今無腸自少年消磨踈
狂但聽雨挑燈歌牀病酒多夢睡時粧 飛花
去良宵長有絲欄舊曲金譜新腔最恨湘雲人

散楚蘭魂傷身是客愁爲鄉筭玉簫猶逢韋郎
近寒食人家相思未忘蘋藻香

于飛樂

鴛鴦怨曲

綺翼翩翩問誰常借春陂生愁近渚風微紫山
深金殿暖日暮同歸白頭相守情雖定事却難
期 帶恨飛來烟埋秦草年年枉夢紅衣舊沙
間香頸冷合是單棲終將怨魂何年化連理芳
枝

南浦

玉樹曉飛香待倩他和愁點破妝鏡輕嫩一天

春平白地都護雨昏烟暝幽花露濕定應獨把
闌干凭謝屐未蠟安排共文鴛重遊芳逕年
來夢裏揚州怕事隨歌殘情趁雲冷嬌眇隔東
風無人會鶯燕暗中心性深盟縱約盡同晴雨
全無定海棠夢在相思過西園秋千紅影

探芳信

謝池曉被酒滯春眠詩縈芳草正一堦梅粉都
未有人掃細禽啼處東風軟嫩約關心早未燒
燈怕有殘寒故園稀到 說道試粧了也爲我
相思占他懷抱靜數窻櫺最懼聽鵲聲好半年

白玉臺邊話屢見鈿小指芳期夜月花陰夢老

祝英臺

柳枝愁桃葉恨前事怕重記紅藥開時新夢又
溱洧此情老去須休春風多事便老去越難回
避阻幽會 應念偷剪酴醾柔條暗縈繫節物
移人春暮更顛顛可堪竹院題詩蘚堦聽雨寸
心外安愁無地

又 薔薇

縮流蘇垂錦綬烟外綠塵逗莫倚莓墻花氣醞
如酒便愁醺醉青虬蜿蜿無力戲穿碎一屏新

繡謾懷舊 如今姚魏俱無風標較消瘦露點
搖香前度剪花手見郎和笑拖裙忽忽欲去驀
忽地罨留芳袖

又

落花深芳草暗春到斷腸處金勒驕風欲過大
堤去翠樓葛嶺西邊恰如曾約畫欄映一枝瓊
樹正凝佇 芳意欺月矜春渾欲便偷許多少
鶯聲不敢寄愁與謝郎日日西湖如今歸後幾
時見倚簾吹絮

清商怨

寒食飲綠亭

春愁遠春夢亂鳳釵一股輕塵滿江烟白江波
碧柳戶清明燕簾寒食憶憶 鶯聲晚簫聲短
落花不許春拘管新相識休相失翠陌吹衣盡
樓橫笛得得

西江月

西月淡窺樓角東風將落簷牙一燈初見影牕紗
紗又是重簾不下 幽思屢隨芳草閑愁多似
楊花楊花芳草遍天涯繡被春寒夜夜

又

賦木犀香數珠

三十六宮月冷百單八顆香懸只宜結贈散花

天金粟分身顯現 指嫩香隨甲影頸寒秋入
雲邊未忘靈鷲舊因緣贏得今生圓轉

又

一片秋香世界幾層涼雨攔干青天不惜爛銀
盤借與先生爲勸 酒喚詩來酒外人言身在
人間如何得似碧雲間且共嫦娥相伴

又

舟中趙子楚有詞
見調即意和之

裙摺綠羅芳草冠梁白玉芙蓉次公筵上見山
公紅綬欲銜雙鳳 已向冰奩約月更來玉界
乘風凌波襪冷一尊同莫負彩舟涼夢

慶清朝

墜絮孳萍狂鞭孕竹偷移紅紫池亭餘花未落
似供殘蝶經營賦得送春詩了夏帷攏斷綠陰
成桑麻外乳鳩穉燕別樣芳情 荀令舊香易
冷歎俊遊踈懶枉自銷凝塵侵謝屐幽徑斑駁
苔生便覺寸心尚老故人前度謾丁寧空相悞
被蘭曲水桃菜東城

憶故人

雙鴛感月天津近歸後嫩情常剩燈市一年愁
凝心共梅花冷 網塵洞戶春沉靜衰盡冶遊

情性羞見素娥嬌影明似愁鸞鏡

又 賦桃花

明霞烘透春機杼春在明霞多處我是有詩漁
父一夢秦天古 柳枝巷陌深朱戶墻外風流
一樹十五年來凝佇彈盡胭脂雨

花心動

風約簾波錦機寒難遮海棠烟雨夜酒未蘇春
枕猶欹曾是悞成歌舞半褰薇帳雲頭散奈愁
味不隨香去儘沈靜文園更渴有人知否 懶
記溫柔舊處偏只怕臨風見他桃樹繡戶鎖塵

錦瑟空絃無復畫眉心緒待拈銀管書春恨被
雙燕替人言語意不盡垂楊幾千萬里

解佩令

人行花塢衣沾香霧有新詞逢春分付屢欲傳
情燕子不曾飛去倚珠簾詠郎秀句 相思一
度穠愁一度最難忘遮燈私語淡月梨花借夢
來花邊廊廡指春衫淚曾濺處

菩薩蠻

梨花不礙東城月月明照見空欄雪花底夜香
微褰簾拜月歸 錦衾幽夢短明日南堂宴宴

罷小樓臺春風來不來

又 賦玉蕊花

唐昌觀裏東風軟齊王宮外芳名遠桂子典刑邊
梅花伯仲間 龐茸鏤暖雪瑣細雕晴月誰駕
七香車綠雲飛玉沙

又 賦軟香

廣寒夜搗玄霜細玉龍睡重癡涎墜鬪合一團
嬌偎人暖欲消 心情雖軟弱也要人搏搦寶
扇莫驚秋班姬應更愁

賀新郎

花落臺池靜自春衫閑來老了舊香荀令酒既
相違詩亦可此外雲沉夢冷又催喚官河蘭艇
軋岸烟霏吹不斷望樓陰欲帶朱橋影和草色
入輕暝 裙邊竹葉多應賸恠南溪見後無箇
再來芳信蝴蝶一生花裏活難制竊香心性便
有段新愁隨定落日年年宮樹綠墮新聲玉笛
西風勁誰伴我月中聽

又

綠障南城樹有高樓銜城樓下芰荷無數客自
倚欄魚亦避恐是持竿伴侶對別浦扁舟容與

楊柳影間風不到倩詩情飛過鴛鴦浦人正在
斷腸處 兩山帶着冥冥雨想低簾短額誰見
恨時眉嫵別爲清尊眠錦瑟怕被歌留愁住便
欲赴採蓮歸去前度劉郎雖老矣奈年來猶道
多情句應笑殺舊鷗鷺

又

鵲翅西風淺乍踈雲垂幔近月銀鈎將捲天上
應閑支機石前度芳盟誰踐便好織回文錦獻
乞得穠歡今夜裏筭盈盈一水曾何遠寧不會
暗相見 綵樓吹斷閑針線想幽情嫩約別有

蕓庭花院青鳥沉沉音塵絕烟鎖蓬萊宮殿漸
木杪參旗西轉不怕天孫成間阻怕人間薄倖
心腸變又學得易分散

又

六月十五夜西湖月下

同住西山下是天地中間愛酒能詩之社船向
少陵佳處放塵世必無知者暑不到雪宮風榭
楚竹忽然呼月上被東西幾葉雲縈惹雲
散去笑聲罷 清尊莫爲嬋娟瀉爲狂吟醉舞
毋失晉人風雅踏碎橋邊楊柳影不聽漁樵閑
話更欲舉空杯相謝北斗以南如此幾想吾曹

便是神仙也問今夜是何夜

又

湖上高賓王趙子楚同賦

西子相思切
委蕭蕭風裳水珮
照人清越
山染蛾眉波曼
睳聊可與之娛
悅便莫賦湘妃
羅襪怕見綠荷
相倚恨恨白鷗
占了涼波濶
揀涼處放船歇
道人不是塵埃
物縱狂吟魂
魄吹亂一巾涼
髮不覺引杯澆
肺渴正要清歌
駭發更坐上其
人冰雪截取斷
虹堪作釣待
玉奩今夜來時
節也勝釣石城
月

夜合花

賦笛

冷截龍腰偷拏鸞爪
楚山長鎖秋雲
梅華未落年年
怨入江城千嶂
碧一聲清杜人
間兒女簫笙共
滄涼處琵琶湓
浦長嘯蘓門
當時低度西鄰
天澹攔干欲暮
曾賦高情子期
老矣不堪帶酒
重聽纖手靜七
星明有新聲應
更魂驚夢回人
世寥寥夜月空
照天津

又

柳鎖鶯魂花翻蝶
夢自知愁染潘
郎輕衫未攬猶
將淚點偷藏念
前事怯流光早
去春窺酥雨池
塘向銷凝裏梅
開半面情滿徐
妝風絲一

寸柔腸曾在歌邊惹恨燭底縈香芳機瑞錦如
何未織鴛鴦醉扶人月依墻是當初誰敢踈狂
把閑言語花房夜久各自思量

留春令

金林檎詠

秀肌豐靨韻多香足綠勻紅注剪取東風入金
盤斷不買臨邛賦 宮錦機中春富裕勸玉環
休妒等得明朝酒消時是閑澹雍容處

又

詠梅花

故人溪上掛愁無奈烟梢月樹一涓春水點黃
昏便沒頓相思處 曾把芳心深相許故夢勞

詩苦聞說東風亦多情被竹外香留住

瑞鶴仙

杏煙嬌濕鬢過杜若汀洲楚衣香潤回頭翠樓
近指鴛鴦沙上暗藏春恨歸鞭隱隱便不念芳
盟未穩自簫聲吹落雲東再數故園花信 誰
問聽歌牕罇倚月鈞欄舊家輕俊芳心一寸相
思後總灰盡奈春風多事吹花搖柳也把幽情
喚醒對南溪桃萼翻紅又成瘦損

又

賦紅梅

館娃春睡起爲發妝酒暖臉霞輕膩冰霜一生

裏厭從來冷澹粉腮重洗胭脂暗試便無限芳
穠氣味向黃昏竹外寒深醉裏爲誰偷倚 嬌
媚春風模樣霜月心腸瘦來肌體孤香細細吹
夢到杏花底被高樓橫管一聲驚斷却對南枝
洒淚謾相思桃葉桃根舊家姊妹

點絳脣

花落苔香斷無人肯行鷓鴣晚風翻繡吹醒東
窗酒 獨卧氍毹明月知人瘦香銷後亂愁依
舊開

胡酥手

又六月十四夜與社友泛湖過西陵橋巳子夜矣

山月隨人翠蘋分破秋山影釣船歸盡橋外詩
心迥 多少荷花不蓋鴛鴦冷西風定可憐潘
鬢偏浸秦臺鏡

青玉案

蕙花老盡離騷句綠染遍江頭樹日午酒消聽
驟雨青榆錢小碧苔錢古難買東君住 官河
不礙遺鞭路被芳草將愁去多定紅樓簾影暮
蘭燈初上夜香初炷猶自聽鸚鵡

浣溪沙

不見東山月露香姚家借得小芬芳亂鶯隨趁

過宮牆 香珀碾花嬌有意綠茸繡葉滋無光
御封春酒幾時嘗

蝶戀花

二月東風吹客袂蘇小門前楊柳如腰細蝴蝶
識人遊冶地舊曾來處花開未 幾夜湖山生
夢寐評泊尋芳只怕春寒裏今歲清明逢上已
相思先到濺裙水

臨江仙

草脚青回細膩柳梢綠轉條苗舊遊重到合魂
銷棹橫春水渡人凭赤欄橋 歸夢有時曾見

新愁未肯相饒酒香紅被夜迢迢莫交無用月
來照可憐宵

又

倦客如今老矣舊時不奈春何幾曾湖上不經
過看花南陌醉駐馬翠樓歌 遠眼愁隨芳草
湘裙憶着春羅枉教裝得舊時多向來簫鼓地
猶見柳婆娑

又

愁與西風應有約年年同赴清秋舊遊簾幕記
揚州一燈人着夢雙鴈月當樓 羅帶鴛鴦塵

暗淡更須整頓風流天涯萬一見溫柔瘦應因
此瘦羞亦為郎羞

漢宮春

友人與星娘有舊分別
去則黃冠矣托予寄情

花隔東垣詠燕臺秀句結帶謀歡匆匆舊盟有
限飛夢重關南塘夜月照湘琴別鶴孤鸞天便
遣清愁易長春衣常恁香寒唐昌故宮何許
頓剪霞裁霧擺落塵緣一聲步虛婉婉雲駐天
壇淒涼故里想香車不到人間羞再見東陽帶
眼教人依舊思允

蘭陵王

南湖同碧蓮見
寄走筆次韻

漢江側月弄仙人珮色含情久搖曳楚衣天水
空濛染嬌碧文漪篔簹影織涼骨時將粉飾誰曾
見羅襪去時點點波間冷雲積相思舊飛鷁
謾想像風裳追恨瑤席涉江幾度和愁摘記雪
映雙腕刺縈絲縷分開綠蓋素袂濕放新句吹
入寂寂意猶昔念淨社因緣天許相覓飄蕭
羽扇搖團白屨側卧尋夢倚欄無力風標公子
欲下處似認得

風入松

末利花

素馨拊萼太寒生多剪春冰夜深綠霧侵涼月

晶晶花葉分明人卧碧紗幙淨香吹雪練衣輕
頻伽街得墮南薰不受纖塵若隨荔子華清
去定空埋身外芳名借重玉爐沉炷起予石鼎
湯聲

隔浦蓮

紅塵飛不到處此地知無暑亂竹分幽徑虛堂
中自回互陰壑生暗霧飛泉注氣入閑尊俎快
風度齊宮楚榭如今空鎖烟樹何人伴我夢
賦雪車冰柱惟有蟬聲助冷語驚寤飛雲來獻
涼雨

又 荷花

洛神一醉未醒俯鑑窺紅影萬綠森相衛西風
不放冷侵曉鷗夢穩非塵境棹月香千頃錦機
靚亭亭不語多應嗔賦玉井西湖遊子慣識
雨愁烟恨只恐吳娃暗折贈耿耿柔絲容易縈
損

鳳來朝

五日感事

暈粉就妝鏡掩金閨綵絲未整趁無人學指鴛
鴦頸恨誰踏蘚花逕一夢蒲香葵冷墮銀瓶
脆繩掛井扇底弄團圓影只此是沈郎病

玉簫涼

秋是愁鄉自錦瑟斷絃有淚如江平生花裏活
奈舊夢難忘藍橋雲樹正綠料抱月幾夜眠香
河漢阻但鳳音傳恨攔影敲涼 新妝蓮嬌試
曉梅瘦破春因甚却扇臨牕紅巾銜翠翼早弱
水茫茫柔情各自未剪問此去莫負王昌芳信
準更敢尋紅杏西廂

鵲橋仙

七夕舟中

河深鵲冷雲高鸞遠水珮風裳縹緲却推離恨
下人間第一箇黃昏過了 舟行有限愁來無

限去去長安漸杳應將巧思入相思 淚比銀
灣較少

湘江靜

暮草堆青雲浸浦記匆匆倦篙曾駐漁榔四起
沙鷗未落怕愁沾詩句碧袖一聲歌石城怨西
風隨去滄波蕩晚菰蒲弄秋還重到斷魂處
酒易醒思正苦想空山桂香懸樹三年夢冷孤
吟意短屢煙鐘津鼓屐齒厭登臨移橙後幾番
涼雨潘郎漸老風流頓減閑居未賦

玲瓏四犯

雨入愁邊翠樹晚無人風葉如剪竹尾通涼却
怕小簾低捲孤坐便怯詩慳念後賞舊曾題遍
更暗塵偷鎖鸞影心事屢羞團扇賣花門館
生秋草悵弓彎幾時重見前歡盡屬風流夢天
共朱樓遠聞道秀骨病多難自任從來恩怨料
也和前度金籠鸚鵡說人情淺

又

京口寄所思

濶甚吳天頓放得江南離緒多少一雨爲秋涼
氣小牕先到輕夢聽徹風蒲又散入楚空清曉
問世間愁在何處不離澹烟衰草簾紋獨浸

芙蓉影想淒淒欠郎偎抱即今卧得雲衣冷山
月仍相照方悔翠袖易分難聚有玉香花笑待
雁來先寄新詞歸去且教知道

八歸

秋江帶雨寒沙縈水人瞰畫閣愁獨烟篆散響
驚詩思還被亂鷗飛去秀句難續冷眼盡歸圖
畫上認隔岸微茫雲屋想半屬渙市樵村欲暮
競然竹須信風流未老憑持酒慰此淒涼心
目一鞭南陌幾篙官渡賴有歌眉舒綠只匆匆
眺遠早覺閑愁挂喬木應難奈故人天際望徹

淮山相思無雁足

過龍門

一帶古苔墻多聽寒螿篋中針線早銷香燕尾
寶刀牕下夢誰剪秋裳 宮漏莫添長空費思量
鴛鴦難得再成雙昨夜楚山花簾裏波影先涼

又

醉月小紅樓錦瑟瑩篔簹夜來風雨曉來收幾點
落花饒柳絮同爲春愁 寄信問晴鷗誰在芳
洲綠波寧處有蘭舟獨對舊時攜手地情思悠
悠

玉蝴蝶

晚雨未摧官樹可憐閑葉猶抱涼蟬短景歸秋
吟思又接愁邊漏初長夢魂難禁人漸老風月
俱寒想幽歡土花庭甃蟲網攔干 無端啼蛄
攪夜恨隨團扇苦近秋蓮一笛當樓謝娘懸淚
立風前故園晚強留詩酒新鴈遠不致寒暄隔
蒼煙楚香羅袖誰伴嬋娟

齊天樂

白髮

秋風早入潘郎鬢斑斑遽驚如許暖雪侵梳晴
絲拂領栽滿愁城深處瑤簪謾妒便羞插宮花

自憐衰暮尚想春情舊吟淒斷茂陵女 人間
公道惟此歎朱顏也恁容易墮去涅不重緇搔
來更短方悔風流相誤郎潛幾縷漸疎了銅駝
俊遊儔侶縱有黠黠奈何詩思苦

又

闌干只在鷗飛處年年怕吟秋興斷浦沈雲空
山挂雨中有詩愁千頃波聲未定望舟尾拖涼
渡頭籠暝正好登臨有人歌罷翠簾冷 悠然
魂墮故里奈閑情未了還被吹醒拜月虛簷聽
蛩壞砌誰復能憐嬌俊憂心耿耿寄桐葉芳題

蛩壞砌誰復能憐嬌俊憂心耿耿寄桐葉芳題
冷楓新詠莫遣秋聲樹頭喧夜永

又

賦橙

犀紋隱隱鶯黃嫩籬落翠深偷見細雨重移新
霜試摘佳處一年秋晚荆江未遠想橘友荒涼
木奴嗟怨就說風流草泥來趁蟹螯健 并刀
寒映素手醉魂沉夜飲曾倩排遣沆瀣含酸金
甕裹玉蔌蔌吳鹽輕點瑤姬齒軟待惜取團圓
莫教分散入手温存帕羅香自滿

又

湖上即席分韻得羽字

鴛鴦拂破蘋花影低低趁涼飛去畫裏移舟詩
邊就夢葉葉碧雲分雨芳游自許過柳影閑波
水花平渚見說西風爲人吹恨上瑤樹 攔干
斜照未滿杏牆應望斷春翠偷聚淺笑接香深
盟搵月誰是窻間青羽孤箏幾柱問因甚叅差
斲成離阻夜色空庭待歸聽俊語

又

中秋宿真定驛

西風來勸涼雲去天東放開金鏡照野霜凝入
河桂濕一一冰壺相映殊方路永更分破秋光
盡成悲境有客躊躇古庭空自弔孤影 江南

朋舊在許也能憐天際詩思誰領夢斷刀頭書
開蠶尾別有相思隨定憂心耿耿對風鵲殘枝
露蛩荒井斟酌姮娥九秋宮殿冷

燕歸梁

楚夢吹成樹外雲乍鴈影斜分黃花心事一簾
塵但頻憶小腰身 今宵素壁冰絃冷怕彈斷
沈郎魂秋衣因甚滿愁痕是干預幾黃昏

又

獨卧秋窻桂未香怕雨點飄涼玉人只在楚雲
傍也着淚過昏黃 西風今夜梧桐冷斷無夢

到鴛鴦秋鉦二十五聲長請各自奈思量

月當廳

白壁舊帶秦城夢因誰拜下楊柳樓心正是夜
分魚鑰不動香深時有露螢自照占風裳可喜
影懨金坐來久都將涼意盡付沈吟 殘雲事
緒無人捨恨忽忽藥娥歸去難尋綴取霧窻曾唱
幾拍清音猶有老來印愁處冷光應念雪翻簪
空獨留對西風緊弄一井桐陰

秋霽

江水蒼蒼望倦柳愁荷共感秋色虛閣先涼古

簾空暮鴈程最嫌風力故園信息愛渠入眼南
山碧念上國誰是鱸鱸江漢未歸客 還又歲
晚瘦骨臨風夜聞秋聲吹動岑寂露蛩悲清燈
冷屋翻書愁上鬢毛白年少俊遊渾斷得但可
憐處無奈萋萋魂驚採香南浦剪梅烟驛

滿江紅

中秋夜潮

萬水歸陰故潮信盈虛因月偏只到涼秋半破
闕成雙絕有物揩磨金鏡淨何人拏攫銀河決
想子胥今夜見嫦娥沉冤雪 光直下蛟龍穴
聲直上蟾蜍窟對望中天地洞然如刷激氣已

能驅粉黛舉杯便可吞吳越待明朝說似與兒
曹心應折

又書懷

好領青衫全不向詩書中得還也費區區造物
許多心力未暇買田清潁尾尚須索米長安陌
有當時黃卷滿前頭多慙德思往事嗟兒劇
憐牛後懷鷄肋奈稜稜虎豹九重九隔三徑就
荒秋自好一錢不直貧相逼對黃花常待不吟

詩詩成癖

又九月二十一日出京懷古

緩轡西風歎三宿遲遲行客桑梓外鋤耰漸入
柳坊花陌雙闕遠騰龍鳳影九門空鎖鴛鴦翼
更無人擲笛傍宮牆苔花碧天相漢民懷國
天厭虜臣離德趁建瓴一舉并收鰲極老子豈
無經世術詩人不預平戎策辦一襟風月看升
平吟春色

戀繡衾

吳梅初試澗谷春夜幽幽江雁叫雲人正在孤
窻底被穠愁醺破醉魂雨窻只剩殘燈影伴
羅衣無限淚痕瘦骨怕紅綿冷說年時斗帳夜

分

又

黃華驚破九日愁正寒城風雨怨秋愁便是秋
心也又隨人來到畫樓因緣幸自天安頓更
題紅不禁御溝待寫與相思話為怕奴顛顛且
休

又 席上夢錫
漢章同賦

天風入扇吹苧衣小紅樓夜氣正微有人在冰
絃外水精簾花影自移陽臺只是虛無夢便
不成涼夜誤伊想閑了瑠璃簾就一身明月伴

歸

換巢鸞鳳 梅意

人若梅嬌正愁橫斷塢夢繞谿橋倚風融漢粉
坐月怨秦簫相思因甚到纖腰定知我今無魂
可銷佳期晚謾幾度淚痕相照人悄天眇眇
花外語香時透郎懷抱暗握萋苗乍嘗櫻顆猶
恨侵堦芳草天念王昌忒多情換巢鸞鳳教偕老
溫柔鄉醉芙蓉一帳春曉

惜奴嬌

香剝酥痕自昨夜春愁醒高情寄冰橋雪嶺試

約黃昏便不悞春昏信人靜倩嬌娥留連秀影
吟鬢簪香已斷了多情病年年待將春管領
鏤月描雲不枉了閑心性謾聽誰敢把紅顏比
並

龍吟曲 問梅劉寺

夜寒幽夢飛來小梅影下東風曉蝶魂未冷吾
身良是悠然一笑竹杖敲苔布鞋踏凍歲常先
到傍蒼林却恨儲風養月須我輩新詩甲 永
以南枝爲好怕從今逢花漸老愁消秀句寒回
斗酒春心多少之子逃空伊人遯世又還驚覺

但歸來對月高情耿耿寄白雲杪

又雪

夢回虛白初生便疑冷月通窻戶不知夜久都
無人見玉妃起舞銀界回天瓊田易地晃然非
故想兒童健意生愁霽色情頻在窺簷處 一
片樵林釣浦是天教王維畫取未如授簡先將
高興收歸妙句江路梅愁灞陵人老又騎驢去
過章臺記得春風乍見倚簾吹絮

又 陪節欲行留別社友

道人越布單衣興高愛學蘇門嘯有時也伴四

佳公子五陵年少歌裏眠香酒酣唱月壯懷無
撓楚江南每爲神州未復攔干靜慵登眺 今
日征夫在道敢辭勞風沙短帽休吟稷穗休尋
喬木獨憐遺老同社詩囊小窻針線斷腸秋早
看歸來幾許吳霜染鬢驗愁多少

鷓鴣天

睡袖無端幾摺香有人丹臉可占霜半窻月印
梅猶瘦一律併笙夜正長 情艷艷酒狂狂小
屏誰與畫鴛鴦解衣恰恨敲金釧驚起春風傍
枕囊

又 燈市書事

御路東風拂醉衣賣燈人散燭籠稀不知月底
梅花冷只憶橋邊步襪歸 閑夢澹舊游非夜
深誰在小簾幃星兒下團爐坐明處將人立
地時

又 記感

搭柳攔干倚佇頻杏簾蝴蝶繡床春十年花骨
東風淚幾點螺香素壁塵 簫外月夢中雲秦
樓楚殿可憐身新愁換盡風流性偏恨鴛鴦不
念人

又 衛縣道中有懷其人

鴈足無書古塞幽一程煙草一程愁帽簷塵重
風吹野帳角香銷月滿樓情思亂夢魂浮細
裙多憶弊貂裘官河水靜欄干暖徒倚斜陽怨
晚秋

惜黃花

九月七日
定興道中

涵秋寒渚染霜丹樹尚依稀是來時夢中行路時
節正思家遠道仍懷古更對着滿城風雨黃
花無數碧雲欲暮美人兮美人兮未知何處獨
自捲簾櫳誰爲開尊俎恨不得御風歸去

玉燭新

踈雲縈碧岫帶晚日搖光半江寒皺越溪近遠
空頻向過鴈風邊回首酸心一縷念水北尋芳
歸後輕醉醒隄月籠沙鞍鬆寶輪飛驟秦樓
屢約芳春記扇背題詩帕羅沾酒瘦愁易就因
驚斷夢裏桃源難又臨風話舊想日暮梅花孤
瘦還靜倚修竹相思盈盈翠袖

一剪梅

誰寫梅谿字字香沙邊幽夢常恁芬芳不如花
解伴昏黃只怕東風吹斷人腸小閣無燈月

浸窻香吹羅袖酒映宮妝如今竹外怕思量谷
裏佳人一片冰霜

又 追感

秦客當樓泣鳳簫宮衣香斷不見纖腰隔年心
事又今宵折盡冰絃何用鸞膠 些子輕魂幾
度銷蘭騷蕙些無計重招東窻一段月華嬌也
帶春愁飛上梅梢

醉落魄

鴛鴦意愜空分付有情眉睫齊家蓮子黃金葉
爭比秋苔靴鳳幾番躡 墻陰月白花重疊忽

忽軟語屢驚怯宮香錦字將盈篋雨長新寒今
夜夢魂接

又

浙江送人時子
振之官越幕

江痕妥貼日光慰動黃金葉闌干直下愁相接
一朶紅蓮飛上越人楫 鯉魚波上丁寧切詩
筒如綫不曾別明年好箇春風客五鷄交飛身
在玉皇闕

醉公子

詠梅寄南
湖先生

神仙無臯澤瓊裾珠珮捲下塵陌秀骨依依誤
向山中得與相識溪岸側倚高情自鎖烟翠時

點空碧念香襟沾恨酥手剪愁今後夢魂隔
相思暗驚清吟客想玉照堂前樹三百鴈翅霜
輕鳳羽寒深誰護春色詩鬢白總多因水村携
酒烟墅留屐更時帶明月同來與花爲表德

步月

剪柳章臺問梅東閣醉中携手初歸逗香簾下
璀璨鏤金衣正依約冰絲射眼更荏苒蟾玉西
飛輕塵外雙鴛細蹙誰賦洛濱妃 霏霏紅霧
繞步搖共鬢影吹入花圍管絃將散人靜燭籠
稀泥私語香櫻乍破怕夜寒羅襪先知歸來也

相偎未肯入重幃

梅溪詞

明紫芝漫抄黑格本對勘一遍頗有佳字此
鈔亦精審勝汲古本也丁丑十二月老發記





